

有一種人……



「下雨天上學天上課不上」，算吧啦，想走堂就走堂啦，何必賴天氣。「走堂」呢味嘢對於freshmen嚟講應該幾新鮮，中學嘅時候想唔上堂除非你病咗，否則就要出盡奇招，例如飲杯熱水走去探熱，然後揸住支探熱針同呀媽講自己發燒，目的就係要呀媽幫你打返學校請假。上到嚟大學，你唔想上堂就唔洗去上，絕對唔洗搞咁大場大龍鳳。

圖/文：長眠學渣
排：oi

人在上堂

究竟真係有去上堂嘅同學仔係為咗啲咩而去上嘅呢？所謂同室異夢，大家都係坐喺課室度，但就有好多種人。根據小編觀察所得，課室內嘅同學仔大致可以分為以下幾種：



有一種人係為咗attendance，呢種人多數得個肉身坐喺度，但靈魂喺邊？Anywhere but lesson，可能係開部notebook出嚟chur緊paper，用緊WhatsApp Web同Facebook，甚至睇緊無聲片或者煲緊無聲劇，一係就玩吓電話瞓吓覺咁囉。

有一種人覺得個人坐喺課室就係盡咗做學生嘅責任，對得住天地良心，最重要係對得起嗰\$42,100嘅學費。呢種人為咗自我感覺良好，令自己相信自己真係有上堂，真係去學嘢，佢哋上堂都會專心少少，可能會抄吓notes咁，不過抄完會唔會睇返又係另一回事啦。

有一種人係真心學嘢，佢哋會專心聽書，jot notes同埋問啲得佢哋同prof至明嘅嘢係基本，如入無人之境。呢種人多數係學霸，上堂嘅時候會打醒十二分精神，無論肉身定靈魂都齊集喺課堂中。

仲有種人係為咗搏表現討好prof，上堂嘅時候，佢哋會相當積極，準唔準時去上堂唔係重點，最緊要係賣屎忽賣到一個忘我嘅境界。呢種人去上堂無它嘅，就係想prof認得自己可以加啲印象分囉，但如果到放GPA嘅時候發現自己落力為你好，得不到分數，就會一個破冰轉身詛咒返個prof轉頭，真係善變過女人。

人在Present ●

以上情況多出現於lecture時候，而tutorial多數都係拎嚟俾同學仔做present嘅。到present嘅時候，大家所見到嘅景象又會有所不同，大致情況會係咁：



首先，當然係有一個或一gp人企嚟出面present，佢哋除咗要預備ppt同戰戰兢兢嘅心情，仲要print全班份量嘅copies，係真·貼錢買難受，仲要預備定會俾同學仔或者prof挑機。

有一種人又係為attendance，佢哋一入到去拎份present copy，然後就會搵個有咁起眼嘅位坐低，開始玩電話或者瞓覺直到永遠。呢種人多數都係孑然一身，兩手fing fing咁行入嚟，筆都冇枝，到點名或者落堂嘅時候就會甦醒。

有一種人為咗class participation嘅5%或10%，不惜化身mean怪，佢哋會好仔細咁scan你份嘢同聽你嘅present，到Q&A嘅時候就大發神威逐粒字捉你，令你仿置於殘酷不仁嘅con day咁，但你會feel到係有嘢搵嘢嚟問。

有一種人抱住集郵嘅心態，為咗儲齊所有presenter嘅copies而堂堂到，儲齊冇獎，但就係有種莫名嘅成功感，雖然到最後其實都係得個儲字，擺到返去都未必會睇返。

有一種人係為咗食花生（此適用於有fd一齊讀嘅同學仔），佢哋會喺個fd present嘅時候整啲衰樣，務求令到個fd忍唔到笑為止。又或者會影低個fd present時嘅英姿然後sd上gp，再喺個gp度用文字直播，真係夠晒老友。

有一種人叫學霸，佢哋全程都會留心聽，到Q&A嘅時候就會問啲你根本唔會明，更加唔好話答到嘅問題。唔知佢哋係真心覺得啲問題係正常人level，定有心留難你，總之你唯一可以做嘅嘢就係亂答，重複講吓個ppt講到懶頭頭是道咁擾吓敵。

人在走堂 ●

一直喺度講平時上堂同埋同學仔做present嘅情景，唔知大家有冇留意到上面兩幅圖嘅空機呢？唔好以為個課室係大到坐晒全班都仲有咁多位淨，其實只係因為仲有啲走堂嘅好夥伴，至於點解會走堂？都有好多原因嘅，大概又可以有以下幾種：

有一種人會善用SEM頭Add drop period去體驗人生，呢個時候嘅佢哋仍然身處外地旅遊中，故此時屬走堂旺季，事關呢段時間係唔計Attendance嘅，咁就輕鬆走一星期堂。

有一種人叫死線戰士，佢哋每逢到SEM尾就會忙到甩轆，呢個時候點樣可以變多啲時間出嚟俾自己chur paper？好簡單啫，唔上堂咪多好多時間用囉！戰士們就選擇咗走堂去搵Hall/拉把繼續佢哋嘅工作。所以SEM尾是為另一走堂高峰期。

有一種人係因為上咗庄，佢哋就可能會喺Pro P期間走堂企booth宣傳啦。

仲有啲咩原因會走堂？等小編分享吓啲個人經驗啦，小編就試過因為同fd吹八婆水吹得太興奮而走咗堂，但其實有時走堂真係有咩特別原因嘞，純粹就係唔想上堂囉，係好隨性嘞，上堂都要睇心情嘞。

大家毋須對於小編咁得閒研究埋啲咁嘅嘢而感到驚訝，事關小編乃係一位坐於課室角落嘅自閉學生，平時如果精神唔錯而課題又吸引嘅話，小編都會專心聽吓jot吓notes咁嘅，不過呢種情況全年都未必有四五次。大多數情況下，小編都只會喺首半個鐘頭清醒，之後就進入思緒放空狀態，俗稱中眼瞓，到課堂中段開始恢復知覺飲啖水、玩吓手機咁，到最後就欣賞吓周邊同學喺度做緊啲咩，觀賞吓呢個上堂眾生相。

假如大家可以好似小編咁笑看風雲吓，其實上堂都唔係咁悶啫。關於上堂、關於Present、關於走堂，所有都同我哋息息相關，雖然講唔出啲咩大道理，但希望大家睇完之後會覺得非常之有親切感。

